

RHAGLEN DIWYGIO'R GWASANAETHAU DEINTYDDOL CYFFREDINOL (GDC)

Digwyddiadau Ymgysylltu | Rhithwir | 26, 27 a 28 Medi 2022

Adroddiad Gwerthuso ac Adborth ar y Digwyddiad

Crynodeb o'r Digwyddiad

Cynhaliwyd y digwyddiad hwn deirgwaith dros dair noson yn olynol, er mwyn rhoi'r cyfle mwyaf posibl i bobl fynychu heb leihau ansawdd y profiad oherwydd digwyddiadau gorlawn. Roedd y digwyddiad yn cynnwys cyfuniad o gyflwyniadau byw a fideos wedi'u recordio ymlaen llaw yn yr hanner cyntaf, er mwyn caniatáu i'r rhai a oedd yn bresennol gael y newyddion diweddaraf am waith Rhaglen Diwygio'r GDC, gan gynnwys y cynnydd hyd yma, syniad o'r hyn y gall practisau ei ddisgwyl ar gyfer 2023/24 a throsolwg o gynlluniau'r Rhaglen dros yr ychydig flynyddoedd nesaf. Roedd ail hanner y digwyddiad yn caniatáu i fynychwyr symud i ystafelloedd cyfarfod rhithwir ar gyfer trafodaethau wedi'u hwyluso ar Gynllun Diwygio Contract y GDC.

Nodau'r Digwyddiad

Yn dilyn ailddechrau Rhaglen Diwygio'r GDC ym mis Ebrill 2022, ac ar ganol cytundeb amrywio contract 2022/23, nod y digwyddiad hwn oedd darparu gwybodaeth am waith parhaus y Rhaglen a chyfle pellach i fynychwyr roi adborth agored a gonest am eu profiadau dros y chwe mis diwethaf. Nod y digwyddiad hefyd oedd rhoi sicrwydd i dimau deintyddol ynghylch tegwch y broses gwneud penderfyniadau mewn adolygiadau diwedd blwyddyn a syniad o'r disgwyliadau ar gyfer mis Ebrill 2023.

Cynlluniwyd y digwyddiad ymgysylltu hwn ar Raglen Diwygio'r GDC i ganolbwyntio ar y canlynol:

- **Rhannu** adborth ar brofiadau clinigwyr o'r rhaglen bresennol i ddiwygio'r gwasanaethau deintyddol
- **Amlinellu** cyfeiriad y rhaglen ddiwygio yn y dyfodol a chlywed am yr addasiadau arfaethedig o'r flwyddyn dysgu gweithredol gyfredol
- **Disgrifio** sut y mae Egwyddorion Gofal yn cael eu rhoi ar waith mewn ymarfer clinigol.


Agenda'r Digwyddiad:

- **Gair o Groeso** gan Alex Slade, Cyfarwyddwr Gofal Sylfaenol ac Iechyd Meddwl, Llywodraeth Cymru
- **Stori Claf** wedi'i recordio, gan ddefnyddio llais aelod o staff Iechyd Cyhoeddus Cymru (ICC).
- Cyflwyniadau (cymysgedd o rai wedi'u recordio ymlaen llaw a rhai byw):
 - **Diwygio Contract y GDC ac ar ôl hynny: Beth yw'r cynllun?**
Cyflwynwyd gan Andrew Dickenson, Prif Swyddog Deintyddol, Llywodraeth Cymru
 - **Pa wybodaeth a gawn o'r data cynnar?**
Cyflwynwyd gan Paul Brocklehurst, Ymgynghorydd Iechyd Deintyddol Cyhoeddus ac Arweinydd Ffrwd Waith 2, Iechyd Cyhoeddus Cymru
 - **Adolygiad Diwedd Blwyddyn o Arferion Diwygio 2022/23: Egwyddorion a phrosesau mewn Byrddau Iechyd**
Cyflwynwyd gan Peter Greensmith, Cyfarwyddwr Cynorthwyol Dros Dro Gwasanaethau Deintyddol Gogledd Cymru, Bwrdd Iechyd Prifysgol Betsi Cadwaladr (BIPBC)
- Tair ystafell drafod: **Sesiwn ryngweithiol wedi'i hwyluso ar Gynllun Diwygio Contract y GDC**
 - **Ystafell Drafod 1** – Grŵp ffocws ar gyfer Byrddau Iechyd, AaGIC, Cyngorau Iechyd Cymuned, Llywodraeth Cymru, ICC, Cymdeithas Ddeintyddol Prydain-WGDPC, cadeiryddion Pwyllgorau Deintyddol Lleol, Pwyllgor Deintyddol Cymru, Awdurdodau Gwasanaethau Busnes y GIG. Hwyluswyd gan Warren Tolley, Dirprwy Brif Swyddog Deintyddol, Llywodraeth Cymru ac Andrew Pryse, Pennaeth Polisi Deintyddol, Llywodraeth Cymru
 - **Ystafell Drafod 2** – Grŵp ffocws ar gyfer Deiliaid Contract y GIG. Wedi'i hwyluso gan Rob Davies, Cyfarwyddwr Clinigol Cyswllt, Bwrdd Iechyd Prifysgol Cwm Taf Morgannwg (BIPCTM) a Richard Jones, Cyfarwyddwr Clinigol Deintyddol ar gyfer Gwella Ansawdd a Datblygu Gwasanaethau, Bwrdd Iechyd Prifysgol Bae Abertawe (BIPBA) a Chynghorydd Ymarfer Deintyddol, Bwrdd Iechyd Prifysgol Cwm Taf.
 - **Ystafell Drafod 3** – Grŵp ffocws ar gyfer Swyddogion Cyswllt a Gweithwyr Proffesiynol Gofal Deintyddol. Hwyluswyd gan Emyr Roberts, Cyfarwyddwr Cymunedol GDC, Bwrdd Iechyd Prifysgol Caerdydd a'r Fro
- Amlygwyd pwyntiau allweddol o bob grŵp trafod gan yr hwyluswyr yn y sesiwn olaf yn y brif ystafell cyn diwedd y digwyddiad.

Canfyddiadau'r Gwerthusiad

Cyflawni pwrpas/nodau ac effeithiau ehangach (Effeithlonrwydd ac Effaith)





Mynychodd cyfanswm o 262 o bobl y digwyddiadau.



Cwblhaodd 104 ffurflenni adborth. Roedd y bobl a gyflwynodd y ffurflenni yn cynnwys y canlynol (mae rhai o'r bobl hyn yn cyflawni rolau lluosog):

- Rheolwr Ardal (my dentist)
- Cyfarwyddwr Meddygol Cyswllt - Deintyddol
- Cyfarwyddwr Clinigol GDC
- Cyfarwyddwr Clinigol
- Cyfarwyddwr Cymunedol ar gyfer GDC (BIP)
- Rheolwr Cydymffurfiaeth
- Swyddog Contractau Deintyddol
- Nyrs ddeintyddol
- Deintydd: Deiliad Contract Deintyddol y GIG
- Deintydd: Perfformiwr/Cydymaith
- Hylenydd
- ASS y GIG
- Addysgwr Iechyd y Geg
- Rheolwr Gofal Sylfaenol
- Tiwtor Deintyddol Ôl-raddedig
- Rheolwr Practis
- Deintydd wedi ymddeol, Ysgrifennydd LDS
- Deintydd cyflogedig Gwasanaeth Deintyddol Cymunedol

Roedd yr atebion a ddarparwyd ar gyfer y 4 cwestiwn cychwynnol **O ganlyniad i'r digwyddiad hwn** fel a ganlyn:



Nodweddion cadarnhaol cyffredinol y digwyddiad



Addysg a Gwellu Iechyd Cymru (AaGIC)
Health Education and Improvement Wales (HEIW)



Business Services Authority



GIG Cymru NHS Wales



Llywodraeth Cymru
Welsh Government

Adborth gan fynychwyr ar y rhannau **mwyafr defnyddiol** o'r digwyddiad yn cynnwys y themâu canlynol.

Cyflwyniadau

- Roedd cyflwyniadau'r siaradwyr yn ddiddorol ac yn amrywiol. Fe wnes i fwynhau Pete Greensmith yn arbennig.
- Roedd y cyflwyniadau'n amlinellu'r cyfeiriad yn gliriach
- Cyflwyniad o beth nesaf
- Strwythurau Byrddau Iechyd wrth gefnogi GDC
- Data ar ACORN
- Cyflwyniad ar dargedau metrig yn y dyfodol
- Roedd y sylwadau gan y Prif Swyddog Deintyddol yn ddefnyddiol. Mae gen i well syniad o lwybr deintyddiaeth y GIG a'r nodau ar gyfer y dyfodol
- Cyflwyniad y Prif Swyddog Deintyddol ar gynlluniau ar gyfer y dyfodol a rheoli blwyddyn contract 22/23

Cyfle i leisio barn a chlywed gan gydweithwyr a gweithwyr proffesiynol eraill

- Braf clywed safbwyntiau ymarferwyr
- Mae bob amser yn ddiddorol ac yn dda clywed safbwyntiau practisau eraill
- Adborth gan eraill
- Y gallu i leisio fy marn er na chefais atebion
- Clywed barn perchnogion contractau o'r un anian
- Braf cael lleisio fy marn
- Clywed y pwyntiau a godwyd gan ymarferwyr eraill ynghyd ag atebion posibl.
- Clywed bod Ymarferwyr eraill yn cael yr un problemau ac amheuan â mi
- Roedd yn galonogol clywed bod ymarferwyr eraill yn teimlo'r un fath â ni
- Gwrando ar ymarferwyr eraill yn yr un sefyllfa
- Cyfle i roi adborth
- Gwrando ar ymarferwyr eraill
- Dysgu bod materion a godwyd yn gyffredin i bob maes
- Gwybod bod pob practis yn cael problemau tebyg gyda'r metrigau
- Gwybod bod practisau eraill y GIG yn cael trafferth gyda'r broses Ddiwygio
- Y gallu i ofyn y cwestiynau yr oeddwn yn ansicr ohonynt
- Clywed y prif rwystrau mewn practisau eraill
- Gwrando ar yr hyn a gynigiodd fy nghydweithwyr er mwyn gwella/newid y broses Ddiwygio
- Clywed pryderon Practisau Deintyddol yn enwedig y rhai mewn ardaloedd ble mae llawer o angen
- Deall y problemau y mae ymarferwyr eraill yn eu cael gyda'r contract hwn

Rhybudd ymlaen llaw o fetrigau posibl ar gyfer 2023/24

- Bydd rhybudd ymlaen llaw o fetrigau yn y dyfodol yn helpu i lunio fy sgysiau gyda chontractwyr GDC pryderus
- Gwybodaeth am yr hyn i'w ddisgwyl yn nhargedau'r flwyddyn ariannol newydd
- Dod o hyd i wybodaeth am gynlluniau ar gyfer 2022-23
- Cyfeiriad posibl ar gyfer 23/24
- Gweld bod y BILL yn gwranddo ar ein hadborth, wedi lleihau nifer y cleifion newydd
- Edrych tuag at y disgwyliadau ar gyfer y cyfnod 2023/24
- Rhagolwg bach o ba eitemau fydd yn debygol o aros yn rhan o'r broses diwygio'r contract y flwyddyn nesaf
- Gweld gofynion y flwyddyn nesaf
- Dysgu y bydd newidiadau i contract 2023/24
- Dealltwriaeth o'r hyn y mae Llywodraeth Cymru ei eisiau o 23/24 ymlaen
- Deall y newidiadau ar gyfer y flwyddyn nesaf
- Diweddariad ar yr hyn i'w ddisgwyl y flwyddyn nesaf

Sesiynau trafod

- Sesiynau holi ac ateb a thrafodaethau
- Trafod heriau diwygio'r contract
- Clywed barn yr ymarferwyr
- Fe wnaeth Richard a Rob waith gwych yn ystafell y deiliad contract.
- Y trafodaethau grŵp am y problemau y mae deintyddion yn eu hwynebu gyda'r llwyth gwaith cleifion newydd a mynediad at y cleifion presennol neu hanesyddol gan fod cleifion newydd a chleifion mynediad ac achosion brys yn llenwi apwyntiadau'r dydd.
- Roeddwn i'n meddwl bod yr holl siaradwyr a'r hwyluswyr yn y sesiwn grŵp a fynychais yn ddigynnwrf, yn bwyllog, yn gefnogol ac yn gadarnhaol a bydd hynny'n rhoi sicrwydd i ymarferwyr a darparwyr am y dyfodol a, gobeithio, hyder ein bod am weithio gyda'n gilydd i sicrhau diwygiadau gwirioneddol mewn deintyddiaeth
- Y cwestiynau a'r materion a fynegwyd gan fy nghydweithwyr yn yr ystafell drafod.
- Dysgais lawer o'r trafodaeth a oedd yn berthnasol i mi a lle rwy'n ffio i mewn
- Roedd y sesiwn grŵp yn ddefnyddiol iawn. Roedd yn galonogol clywed am frwydrau tebyg gyda diwygio'r contract a wynebwyd gan gydweithwyr.
- Yr ystafell drafod - roedd yn hynod o braf gallu ystyried barn pawb

Dyfodol Rhaglen Diwygio'r GDC

- Cael gwybod am ystyriaethau posibl wrth symud ymlaen gyda diwygio'r contract. Edrych yn benodol ar anghenion gweithwyr gofal deintyddol proffesiynol, nid dim ond sut y gellir eu cefnogi i symud ymlaen yn eu rôl, ond cael eu gwobrwyo am hynny hefyd.
- Cipolwg ar y contract am y 2/3 blynedd nesaf
- Cael gwybodaeth/adborth ar yr hyn sydd wedi bod yn digwydd ac i ba gyfeiriad y mae diwygio'r contract yn mynd yn y dyfodol.
- Amlygu manylion y contract wrth symud ymlaen
- Clywed beth yn fras sy'n digwydd ym maes deintyddiaeth y GIG yn ystod y 12 mis nesaf
- Dysgu y gall therapyddion agor cyrsiau o driniaeth dros dro
- Amlinellu o ddiwygio'r contract a'r amserlen
- Braf gwybod bod y broses yn mynd rhagddi.
- Y cyfeiriad o ran yr amserlen o safbwynt Llywodraeth Cymru.
- Rhannu cyfeiriad strategol a chyfle i'r proffesiwn roi adborth.
- Clywed i ba gyfeiriad y mae'r broses yn mynd / y weledigaeth ar gyfer deintyddiaeth y GIG.
- Diweddariad ar gynnydd
- Deall canlyniadau diwygio hyd yn hyn a'r dyfodol arfaethedig i'r broses ddiwygio
- Diweddariad ar raglen diwygio'r GDC

Arall

- Cael gwybod y dylid hysbysu'r BILI am unrhyw anawsterau/ problemau cyn gynted â phosibl
- Mae'n ddefnyddiol clywed i ba gyfeiriad y mae llunwyr polisïau yn mynd a sylwadau cydweithwyr ar sut mae'n effeithio arnynt
- Yn falch o gael diweddariad a rhywfaint o fewnbwn cyfyngedig.
- Sicrwydd ac eglurhad o'r hyn sy'n digwydd, a syniad o sut yr ydym yn cael ein gwerthuso.
- Cwrdd â phobl o wahanol sefydliadau
- Deall y sefyllfa yn llawn a sut mae'n gweithio - gallu sgwrsio â deiliaid contract eraill
- Y crynodeb er mwyn clywed yr hyn a glywodd hwyluswyr y trafodaethau o'r sylwadau a'r drafodaeth yn yr ystafelloedd.
- Sicrwydd gan BIP Betsi Cadwaladr a chlywed sylwadau/pryderon yn ystod y sesiwn holi ac ateb
- Roeddwn i'n meddwl ei fod yn hynod o dda ac addysgiadol.
- Bod Llywodraeth Cymru yn cydnabod bod problemau mawr yn wynebu deintyddiaeth y GIG yng Nghymru gan gynnwys prinder staff, gormod o gleifion sydd angen cael eu gweld o gymharu â nifer y deintyddion sydd ar gael, yr angen i wella sgiliau nyrsys a'u tâl ar fyrder er mwyn rhoi mwy o gymhelliant iddynt, straen a blinder y mae gweddill y deintyddion yn ei wynebu ar ôl i niferoedd enfawr o'u cydweithwyr adael y practis, y problemau meddygol a all godi oherwydd nad yw deintyddion yn gallu gweld y cleifion o fewn y terfynau amser sydd eu hangen oherwydd y materion uchod.
- Cefnogaeth gan ddeintyddion i roi gwell cydnabyddiaeth i waith gweithwyr gofal deintyddol proffesiynol

Meysydd i'w gwella

Amlygodd adborth ar y rhan **leiaf defnyddiol** o'r digwyddiad y meysydd canlynol i'w gwella.

Cyflwyniadau a negeseuon wedi'u recordio

Roedd rhai mynychwyr yn teimlo bod gormod o amser yn cael ei dreulio ar yr adrannau gwybodaeth, gan eu bod yn ailadrodd gwybodaeth a oedd eisoes yn hysbys, ond roeddent hefyd yn deall nad oes gan bawb yr un lefel o wybodaeth am y broses ddiwygio. Roeddent yn gobeithio y byddai modd canolbwyntio mwy ar drafodaeth yn y digwyddiad nesaf, nawr bod y manylion yn hysbys. Teimlai'r mynychwyr eraill nad oedd y cyflwyniadau'n ddefnyddiol ac nad oeddent yn helpu gyda morâl cyffredinol. Ni fyddai gwybodaeth o Ogledd Cymru yn ddefnyddiol i bawb a oedd yn mynychu'r digwyddiad. Teimlai rhai o'r mynychwyr nad oedd y cyflwyniad ar strwythur Rhaglen Diwygio'r GDC ar gyfer rhannu gwybodaeth yn ddefnyddiol. Teimlai eraill nad oedd y cyflwyniad ar ystadegau yn ddefnyddiol, gan eu bod yn teimlo ei fod yn seiliedig ar ddata wedi'u hystumio ac ni roddwyd rhesymau pam roedd ystadegau penodol yn ymddangos fel yr oeddent. Byddai'n well gan rai mynychwyr pe bai data wedi'i ddangos ar y capasiti presennol i weld cleifion coch o fewn y cyfnod galw'n ôl o 12 mis.

Stori claf

Nododd rhai o'r mynychwyr a lenwodd y ffurflen adborth nad oedd y stori claf a gofnodwyd yn ddefnyddiol. Y teimlad cyffredinol oedd bod taith ac anawsterau presennol cleifion yn dra hysbys a bod timau practis yn clywed straeon fel hyn yn ddyddiol. Teimlent nad oedd y rhan hon o'r digwyddiad yn gwneud lles i forâl ac mai eu prif ddiddordeb ar gyfer y digwyddiad penodol hwn oedd y contract presennol a'r cynlluniau ar gyfer y flwyddyn nesaf. O'r herwydd, byddai wedi bod yn well ganddynt gael mwy o amser yn y sesiynau grŵp yn lle hynny. Mynegwyd pryder hefyd mai un farn yn unig yw canfyddiad cleifion o ansawdd y driniaeth gyffredinol y maent yn ei chael mewn gwirionedd.

Sesiynau trafod

Nododd rhai mynychwyr y byddai mwy o amser yn y sesiynau grŵp wedi bod yn ddefnyddiol er mwyn cael trafodaethau hwy, mwy manwl a hefyd i alluogi mwy o bobl i siarad. Cwestiynwyd y ffordd y rhannwyd rolau rhwng y sesiynau trafod gan ambell un, gan eu bod yn teimlo y byddai wedi bod yn fwy defnyddiol cael cymdeithion a deiliaid contract yn yr un grŵp yn hytrach na gyda gweithwyr gofal deintyddol proffesiynol, oherwydd goblygiadau ariannol gwahanol y contract i bob un o'r rolau hyn. Awgrymwyd rhoi rhybudd ymlaen llaw o'r cwestiynau ar gyfer yr ystafelloedd trafod fel gwelliant posibl, gan y byddai'n galluogi cyfranogwyr i ystyried eu hymatebion cyn y digwyddiad. Teimlai eraill fod y cwestiynau canllaw yn rhy anhyblyg ac nad oedd yn eu galluogi i godi cwestiynau neu bwyntiau y byddent wedi hoffi eu gwneud, megis Datblygiad Clwstwr Carlam (DCC). Byddai rhai mynychwyr wedi gwerthfawrogi pe bai amser wedi'i neilltuo ar gyfer "unrhyw gwestiynau eraill". Nododd rhai mynychwyr nad oedd yn ddefnyddiol clywed am brofiadau gan bractisau sydd â mwy o adnoddau na'u practis nhw ac roedd eraill yn teimlo bod yr ystafelloedd trafod wedi cael eu defnyddio fel cyfle i reffru, a oedd yn ei gwneud hi'n anodd cael sgwrs adeiladol. Er mwyn caniatáu amser addas i ymgysylltu a thrafod â'r proffesiwn, teimlai rhai mynychwyr y dylid cynnal y trafodaethau wedi'u hwyluso fel diwrnod/noson gyfan.

Yr Agenda Gyffredinol

Soniodd rhai o'r mynychwyr eu bod yn teimlo nad oedd y digwyddiad yn ddigon hir. Byddai wedi bod yn well ganddynt gael mwy o amser i fynychu mwy o'r ystafelloedd trafod a/neu gael trafodaethau hwy yn eu prif ystafell drafod. Teimlwyd y byddai digwyddiad hwy yn caniatáu mwy o amser i bawb a oedd yn bresennol siarad, ymhelaethu ar eu pwyntiau a chodi cwestiynau. Teimlai rhai hefyd y gellid bod wedi gwella'r sesiwn yn y brif ystafell ar ddiwedd y digwyddiad pe bai Llywodraeth Cymru wedi defnyddio'r amser hwnnw i ymateb i sylwadau o'r sesiwn adborth.

Dyfodol Rhaglen Diwygio'r GDC

Roedd rhai mynychwyr o'r farn nad oedd yr adolygiad o'r nodau sylfaenol o gymorth. Mae eraill yn teimlo bod y penderfyniadau ar yr hyn sy'n digwydd nesaf eisoes wedi'u gwneud ac nid oedd y wybodaeth ar yr amserlen ar gyfer newid yn ddefnyddiol iawn iddynt. Teimlai rhai mynychwyr nad oedd unrhyw gydnabyddiaeth o faterion yn ymwneud â'r gweithlu, effaith y rhain na sut rydym yn annog y gweithlu presennol i aros yn ddigon hir i gefnogi gweithlu'r dyfodol. Nododd rhai mynychwyr hefyd nad oedd llawer o wybodaeth i'w helpu i ddeall sut yr ydym yn mynd ag effaith ac anawsterau eleni ymlaen i'r flwyddyn nesaf mewn ffordd gadarnhaol. Teimlent nad oedd unrhyw atebion clir wedi'u cyflwyno ar gyfer y problemau a drafodwyd ac maent yn teimlo'n ansicr ynghylch pryd y bydd y problemau hyn yn cael sylw yn y broses o ddiwygio'r contract. Tynnodd eraill sylw at y ffaith bod diwygiadau wedi'u tanariannu'n sylweddol, a fydd yn y pen draw yn effeithio ar a ydynt yn teimlo y gallant barhau â gwaith y GIG.

Materion technegol

Bu oedi cyn bod y brif ystafell yn barod ar gyfer y sesiwn olaf yn rhai o'r digwyddiadau, oherwydd bod rhaid aros i drafodaethau yn yr ystafelloedd trafod ddod i ben. Achosodd hyn ddryswch i rai mynychwyr gan nad oeddent yn siŵr a oedd y sesiwn olaf yn dal i fynd yn ei blaen. Cafodd eraill broblemau technegol lleol ar y dechrau gan fethu dechrau'r digwyddiad. Byddai'n well gan rai gael blwch sgwrsio byw yn ystod y digwyddiad, fel y gallent ychwanegu at y sylwadau a godwyd neu gytuno neu anghytuno â nhw. Nododd niferoedd bach nad oeddent yn hoffi defnyddio Teams ar-lein ar gyfer digwyddiadau.

Hapus gyda chynnwys ac agenda'r digwyddiad

Dewisodd saith mynychwr a lenwodd y ffurflen adborth beidio â chwblhau'r adran yn ymwneud â "Beth oedd y rhan leiaf defnyddiol o'r digwyddiad ymgysylltu" a nododd 20 arall yn yr adran hon bod y digwyddiad yn ddefnyddiol ac nad oeddent yn teimlo bod unrhyw feysydd y gellid gwella arnynt.

Sylwadau ychwanegol ar y digwyddiad

- Mae'n ymddangos bod penderfyniadau eisoes wedi'u gwneud ynghylch y flwyddyn ariannol nesaf o ran ymetrigau ond dywedwyd hefyd y bydd trafodaeth gyda'r proffesiwn, mae'r rhain yn gwrth-ddweud ei gilydd
- Nid wyf yn teimlo fy mod wedi dysgu dim byd newydd
- Mae angen rhywfaint o hyfforddiant/arweiniad mewnol i sicrhau ein bod ar y llwybr cywir
- Ddim yn gwrandao ar ein pryder
- Mae'r bygythiadau mynych o adfachu y soniwyd amdanynt yn ystod y digwyddiad yn gwneud i ddeintyddion deimlo dan straen, eu bod wedi gorweithio, nad ydynt yn cael eu gwerthfawrogi er gwaethaf y gwaith caled a wnânt.
- Nid oedd yn rhoi sicrwydd o gwbl y bydd pethau'n gwella.
- Yn dangos bod dryswch amlwg ynghylch sut y caiff y broses ddiwygio ei rhoi ar waith. Wedi'i roi ar waith yn rhy gynnar heb hyfforddiant cywir ar gyfer practisau.
- Byddai trafodaethau wyneb yn wyneb dros gyfnod o hanner diwrnod neu fwy yn fwy cynhyrchiol.
- Byddai rhestr o gysylltiadau yn ddefnyddiol
- Da ar y cyfan
- Rwy'n cymryd y bydd crynodeb ar gael o'r hyn a ddeilliodd o'r cyfarfodydd a'r camau a gymerir yn sgil hynny
- Mae'n ddefnyddiol cael trafodaethau parhaus ynghylch diwygio. Hoffwn gael mynediad at gynlluniau parhaus ar gyfer diwygio cyn gynted ag y byddant ar gael i gynllunio ar gyfer y dyfodol.
- Rhyngweithiol iawn
- Wedi'i gynllunio a'i gynnal yn dda iawn. Adeiladol!
- Mae'n dal i deimlo fel bod rhywun yn dweud wrthym beth sy'n digwydd yn hytrach na chael ein cynnwys/bod rhywun yn gwrandao arnom.
- Roedd ambell thema gyffredin yn y grŵp perchenogion practisau... practisau'n gweithio'n galetach nag erioed yn ceisio gweld cleifion newydd a hanesyddol, ond oherwydd Covid, mae gan lawer o gleifion ysbytai anghenion deintyddol cynyddol ar hyn o bryd. Mae cynnodau adalw wedi cael eu hymestyn, ond y senario tebygol yw mai dim ond creu ail don o ofynion triniaeth pellach fydd hyn.
- Yn falch bod niferoedd yr cleifion newydd yn cael eu hailasesu.
- Diolch yn fawr
- Efallai y gallem ofyn cwestiwn mwy agored i ddeintyddion a gweithwyr gofal deintyddol proffesiynol eraill am unrhyw syniadau cyffredinol a fyddai ganddynt am y contract GIG newydd.
- Popeth wedi mynd rhagddo'n rhwydd.
- Digwyddiad ymgysylltu rhagorol, a werthfawrogwyd gan bawb a fynychodd.
- Gwell cyfathrebu am y digwyddiad. Ni chafodd ein therapydd deintyddol e-bost yn ei gwahodd i fynychu.
- Amser wedi'i neilltuo o'r gwaith i fynychu cyfarfodydd fel hyn.
- Mae trafodaethau agored fel hyn yn werthfawr iawn i bawb. Mae cynnwys staff ar bob lefel yn y dull cyfathrebu hwn yn creu teimladau hynod gadarnhaol, yn rhoi ymdeimlad o berchnogaeth a chyfrifoldeb i bawb. Mae gan bawb ohonom rywbeth i'w gyfrannu.
- Nid yw'r darlun a gyflwynir o 2022 llwyddiannus yn adlewyrchu'r naws gwirioneddol.
- Ar y cyfan, digwyddiad gwerthfawr iawn - ac yn cael ei werthfawrogi'n fawr.
- Byddai'n fuddiol i bawb dan sylw roi enghreifftiau o sut y gallai ac y dylai cymysgedd sgiliau weithio o fewn Practis Deintyddol Cyffredinol a'r broses o ddiwygio'r contract ac efallai cyfeirio pobl at rywun/practis sy'n gwneud iddo weithio.
- Digwyddiad defnyddiol a diddorol.
- Dylai fod yn beth rheolaidd (unwaith y chwarter efallai?)
- Byddai mwy o ddigwyddiadau adborth lleol yn ddefnyddiol
- Rwy'n mawr obeithio na fydd cynhyrchwyr y digwyddiad heno yn rhoi siwgr ar y bilsen wrth gyflwyno barn pobl.
- Nid oedd cyfle i gael eglurhad ynghylch y pwyntiau a godwyd ar y cyhoeddiad newydd, dim ond cyfle i ofyn cwestiynau yr oedd yn ofynnol i ni wedyn ddarparu atebion ar eu cyfer.



GIG
CYMRU
NHS
WALES

Addysg a Gwella Iechyd
Cymru (AaGIC)
Health Education and
Improvement Wales (HEIW)



Business Services Authority



GIG
CYMRU
NHS
WALES



Llywodraeth Cymru
Welsh Government

- Bydd yn ddefnyddiol gweld y crynodeb a sleidiau'r cyflwyniadau o'r digwyddiad heno.
- Diolch i chi i gyd
- Fformat da - o leiaf doedd dim rhaid cyflwyno cwestiynau ymlaen llaw er mwyn iddynt gael eu sensro.
- Roedd y cwestiynau yn sesiwn drafod 1 yn ymddangos yn fwy perthnasol i ymarferwyr a oedd yn mynd ati i amrywio'r contract yn eu practisau.
- Gadewais ac ymunais â'r grŵp deiliaid contractwyr a oedd yn fwy dadlennol. Roedd hwn wedi'i hwyluso'n dda - llawer o drafod, felly roedd angen mwy o amser i alluogi pawb i gyfleu eu pwyntiau.
- Roedd y sgwrs yn gadarnhaol iawn ynglŷn â chymysgedd sgiliau, ond dywedodd llawer o bractisau nad yw'n hyfw yn ariannol.
- Digwyddiad ardderchog ar y cyfan - gwelliant aruthrol o gymharu â'r digwyddiad ymgysylltu cychwynnol!
- Tryloywder y cwestiynau ac a wrandawyd arnynt ac a gawsant eu hateb
- Daliwch ati gyda'r ymgysylltu os gwelwch yn dda
- Graffiau a diagramau llif a'r teimlad na wrandawyd ar unrhyw Ymarferwyr Deintyddol Cyffredinol
- Roedd yn ddefnyddiol clywed barn cydweithwyr ledled Cymru a chael cyfle arall i roi adborth.
- Teimlaf fod y digwyddiadau hyn o fudd i'r tîm cyfan a gobeithio y byddant yn parhau. Mae'n gyfle da i gydweithio.
- Noson wedi'i threfnu'n dda
- Mwy o gyflwynwyr a hwyluswyr deintyddol benywaidd y tro nesaf. Dynion oedd pob un ohonynt.
- Sesiwn drafod dda gydag adborth da ar y diwedd. Dim ond yn ddefnyddiol os gwrandewir arno.
- Nid oedd y sesiwn gyswllt yn ddienw felly doeddwn i ddim yn teimlo y gallwn i siarad yn agored. Byddai cyfle i roi adborth dienw yn well yn fy marn i.

Adnoddau'r Digwyddiad

Mae holl adnoddau'r digwyddiad ar gael drwy'r dolenni canlynol:

[Alex Slade: Welcome - YouTube](#)

[Patient Story V1 - YouTube](#)

[Andrew Dickenson - Contract Reform and beyond - what is the plan? - YouTube](#)

[Paul Brocklehurst - What does the early data tell us? - YouTube](#)

[Peter Greensmith - End of year review Principles and processes in HBs - YouTube](#)

Diolch i bawb a roddodd adborth.

Bydd yr holl sylwadau ac awgrymiadau a ddarparwyd mewn perthynas ag agenda a chynnwys y digwyddiad yn cael eu hystyried wrth gynllunio digwyddiadau yn y dyfodol.

Bydd sylwadau/adborth ychwanegol a gyflwynwyd, drwy Slido, y ffurflen adborth ar y digwyddiad ac mewn sesiynau grŵp yn ystod y digwyddiad, mewn perthynas â Rhaglen Diwygio'r GDC yn gyffredinol hefyd yn cael eu hystyried mewn gwaith ar y rhaglen yn y dyfodol.

Mae rhestr o Gwestiynau Cyffredin yn cael ei llunio, i roi eglurhad pellach ynghylch cwestiynau ychwanegol a gafwyd yn ystod/ar ôl y digwyddiad hwn a byddant yn cael eu rhannu cyn bo hir yn ogystal â chael eu rhoi ar wefan PCOne.

Os oes gennych unrhyw gwestiynau neu ymholiadau pellach, cysylltwch â dentalpublichealth@wales.nhs.uk